



CONVENIO DE COLABORACIÓN ENTRE A CONSELLERÍA DE POLÍTICA SOCIAL E XUVENTUDE E A FEDERACIÓN AUTISMO GALICIA, PARA PROMOVER A ATENCIÓN DAS PERSOAS CON TRASTORNOS DO ESPECTRO AUTISTA E ÁS SÚAS FAMILIAS EN GALICIA E PARA O MANTEMENTO DA FEDERACIÓN E DAS ENTIDADES FEDERADAS PARA O EXERCICIO 2023

A Comunidade Autónoma de Galicia, segundo o establecido no artigo 27.23 do Estatuto de Autonomía de Galicia, en consonancia coa habilitación competencial outorgada ás Comunidades Autónomas polo artigo 148.1.20 da Constitución Española, ten competencia exclusiva en materia de asistencia social, polo que, na súa virtude se aprobou a Lei 13/2008, do 3 de decembro, de servizos sociais de Galicia.

A Consellería de Política Social e Xuventude é o órgano superior da administración autonómica ao que lle corresponde as competencias en materia de servizos sociais, e consecuentemente a atención do colectivo de persoas con discapacidade, conforme ao Decreto 124/2022, do 23 de xuño, polo que se establece a estrutura orgánica da Consellería de Política Social e Xuventude.

A Federación Autismo Galicia, entidade de natureza asociativa, figura inscrita no Rexistro de asociacións có número 2003/000095-2ª, tendo por finalidade mellorar a calidade de vida das persoas con trastornos do espectro autista e a das súas familias, con actuacións baseadas na transparencia informativa, solidariedade entre os seus membros, igualdade e democracia.

A entidade, declarada de utilidade pública, figura recoñecida e inscrita como entidade de iniciativa social no Rexistro de Entidades Prestadoras de Servizos Sociais có número E-948.

Actualmente faise preciso establecer medidas de apoio orientadas ao desenvolvemento do tecido asociativo integrado polas entidades de iniciativa social que traballan na atención ás persoas con trastornos do espectro autista e ás súas familias, dado que desenvolven unha importante labor complementaria á financiadas a través dos recursos da administración pública.

Nos orzamentos xerais da Comunidade Autónoma de Galicia para o ano 2023 está prevista unha subvención nominativa a favor desta entidade, polo que para a súa instrumentación, conforme ao previsto no artigo 26.1 da Lei 9/2007, do 13 de xuño, de subvencións de Galicia, e o artigo 37.2 do Decreto 11/2009, do 8 de xaneiro, que a desenvolve, e en congruencia cos obxectivos citados, resulta conveniente a sinatura dun convenio de colaboración entre a Consellería de Política Social e Xuventude e Autismo Galicia para a atención ás persoas con trastornos do espectro autista e ás súas familias residentes en Galicia.

O obxecto do presente convenio é a colaboración por parte da Consellería de Política Social e Xuventude no financiamento do mantemento da federación e das entidades federadas así como das actuacións que conforman a programación que ten previsto desenvolver Autismo Galicia durante o ano 2023, orientadas á atención das persoas con trastornos do espectro autista e ás súas familias en Galicia, que a continuación se detallan:

1. Programa de Xestión do coñecemento, para xerar e difundir coñecemento en Galicia





sobre temas de interese para o colectivo, coas seguintes actuacións:

a) Produción de publicacións sobre o TEA a través da "Editorial Autismo Galicia". Neste ano organizarse unha xornada divulgativa e de xestión do coñecemento co eixe temático seleccionado para a publicación "MAREMAGNUN"

b) Participación en eventos, xornadas e congresos. De forma específica realizarase unha xornada de xestión de coñecemento sobre a Síndrome de Asperger co gallo do seu Día Mundial.

c) Colaboración e impulso de investigación sobre o TEA

2. Programa de incidencia política e representación institucional, co fin de representar activamente ao colectivo de persoas con TEA e familias na defensa dos seus dereitos .

3. Programa de incidencia social, que ten como obxectivo promover a transformación social a través dun cambio de visión sobre as persoas con TEA cara o seu desenvolvemento pleno como cidadáns activos e de pleno dereito. Consta coas seguintes actividades:

a) Proxecto "HUB comunicación"

b) Proxecto de sensibilización "Diagnóstico autismo"

c) Elaboración e difusión do calendario Autismo Galicia 2024

d) Campaña DMA 2023 / día mundial do autismo.

e) Campaña día Mundial do Asperger: "Faielle espazo"

f) Campaña día da discapacidade / sensibilización. incidencia social

g) Campaña X solidaria

h) Campañas de sensibilización e incidencia social

i) Campañas RR.SS.: axenda de incidencia do colectivo

j) Colaboración no estudo e estratexia de marca "Autismo" da Confederación Autismo España

4. O programa de atención á persoas con TEA, que ten como obxectivo promocionar servizos específicos e especializados para persoas con TEA en Galicia. Son actividades realizadas para fomentar ás habilidades sociais e a integración e participación comunitaria da persoa con TEA: talleres, excursións, paseos, saídas, etc. Tamén se incluírán actividades que fomenten a autonomía persoal da persoa con TEA dende un punto de vista terapéutico e de afianzamento das súas capacidades de desenvolvemento no entorno natural: comunidade, vivenda.

5. O programa de atención socio-familiar co obxectivo de promocionar servizos específicos e especializados para familias de persoas con TEA.

6. O programa de prevención do deterioro cognitivo das persoas con TEA, que conta coas seguintes actividades:

a) Plans de seguimento permanente do estado de saúde.

b) Actividades de promoción de habilidades de auto coidado e saúde.



- c) Actividades de promoción da independencia nas actividades da vida diaria.
- d) Actividades e técnicas de estimulación cognitiva e multisensorial orientadas a adestrar e mellorar as capacidades cognitivas.

Para o cumprimento da finalidade prevista na cláusula primeira deste convenio a Consellería de Política Social e Xuventude achegará un millón tres centos setenta mil corenta e catro euros (1.370.044,00€), que serán imputados á aplicación orzamentaria 13.04.312E.481.26 dos orzamentos xerais da Comunidade Autónoma de Galicia para o ano 2023.

Dita cantidade destinarase aos gastos de persoal e gastos correntes necesarios para o desenvolvemento das actuacións antes citadas.

Na cláusula sétima do convenio prevese un anticipo de pagamento do 80% do importe da subvención, coa finalidade de que a entidade beneficiaria dispoña desde o inicio do exercicio económico da liquidez suficiente para facer fronte ás obrigas económicas derivadas da execución deste convenio.

O anticipo vén motivado porque, ao tratarse de entidades sen ánimo de lucro, unha parte importante do seu financiamento procede das Administracións Públicas e non contan coa liquidez suficiente ao inicio do exercicio para o desenvolvemento dos programas e actuacións que desenvolven para a atención ás persoas con discapacidade, o que implica ter que acudir a liñas de crédito con entidades bancarias en tanto non perciben o pagamento da subvención concedida, co sobrecusto que iso implica. Así mesmo, conforme aos antecedentes neste centro directivo, as subvencións concedidas en exercicios anteriores a esta entidade están sendo correctamente xustificadas en tempo e forma.

En consecuencia, e dado que ditas condicións de pagamento exceden dos límites previstos no artigo 63.1. un do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, e conforme ao previsto no artigo 63.3 da dita norma para a tramitación deste expediente de gasto será preciso autorización do Consello da Xunta.

Así mesmo, as actuacións obxecto dos programas subvencionados a través deste convenio, recollidas na súa cláusula primeira; a súa adecuación ao ámbito competencial da Consellería de Política Social e Xuventude que asume o seu órgano de dirección a Dirección Xeral de Persoas con Discapacidade, segundo o previsto no Decreto 58/2022, do 15 de maio, polo que se establece a estrutura orgánica da Xunta de Galicia, o Decreto 73/2022, do 25 de maio, polo que se fixa a estrutura orgánica das vicepresidencias e das consellerías da xunta de Galicia, o Decreto 124/2022, do 23 de xuño, polo que se establece a estrutura orgánica da Consellería de Política Social e Xuventude concretamente no seu artigo 21, onde se describen as competencias da dita Dirección Xeral de Persoas con Discapacidade; e as específicas necesidades inherentes ao colectivo ao que van dirixidas, considéranse razóns que acreditan o seu interese social.

Asinado dixitalmente en Santiago de Compostela

O director xeral de Persoas con Discapacidade

Fernando González Abeijón

